



2016/09 №41

O'zbekiston davlat san'at va madaniyat institutining ma'naviy-ma'rifiy, ilmiy, axborot gazetasi

IJOДИY PARVOZ

ЭЗГУЛИК ВА ТАРАҚҚИЁТ ЙЎЛИДАГИ ФИДОЙИ ИНСОН ЭДИ...

Мамлакатимиз, бутун халқимиз оғир жудаликка учради. Буюк давлат ва сиёсат арбоби, Ўзбекистон Республикасининг Биринчи Президенти Ислом Абдуганиевич Каримов 2016 йил 2 сентябрь куни оғир хасталик туйғайли вафот этди.

Мамлакатимизнинг Биринчи Президенти Ислом Каримов ҳақиқатан буюк тарихий шахс эди. Ислом Каримовнинг қатъияти ва жасорати билан республикаимиз мустақилликка эришди ва ўз тараққиёт йўлида улкан муваффақиятларни қўлга киритди.

Ислом Абдуганиевич Каримов 25 йил давомида мустақил Ўзбекистонни бошқариб, очик фуқаролик жамияти ва бозор иқтисодиётига асосланган ҳуқуқий демократик давлат қуришнинг чуқур ўйланган стратегиясини ишлаб чиққан ва уни амалга оширган буюк давлат арбоби сифатида мамлакатимизда ва халқаро майдонда юксак обрў-эътибор қозонди.

Ўзбекистон халқи истиқлол йилларида эришилган барча оламшумул ютуқлар ва натижаларни мамлакатимизнинг Биринчи Президенти номи ва фаолияти билан узвий боғлиқ деб билади.

Давлатимиз раҳбарининг ташаббуси билан Ўзбекистонда барча соҳада кенг қўлми таркибий ислохотлар амалга оширилди. Бу борада Ўзбекистоннинг дунёда энг жадал суръатлар билан ривожланиб бораётган иқтисодиётга эга бўлган бешта давлат қаторидан жой олгани ислохотларнинг амалий ифодаси бўлди.

Ислом Абдуганиевич Каримов ўз ҳаётининг асосий қисмини минтақамизда ва бутун дунёда тинчлик ва барқарорликни сақлашга бағишлади.

Президентимизнинг узоқни кўзлаган доно сиёсати, матонати, жасорати билан Ўзбекистон тинчлик ва осойишталик барқарор, турли миллат ва диний конфессиялар вакиллари ўзаро ҳамжиҳат, аҳил ва тотувликда истиқомат қилаётган мамлакатга айланди.

Ислом Абдуганиевич Каримов мамлакатимизнинг бугунги ва эртанги кунининг ҳал қилувчи кучига айланиб бораётган ёшларимизнинг онгу тафаккури ва дунёқарашини бутунлай ўзгартирди, навқирон авлодни тарбиялаб, вояга етказишнинг янги принципаал тизимини ташкил қилиш ва уни ҳаётга жорий этиш ишларига бевосита раҳбарлик қилди.

Муҳтарам Президентимиз доимо ёшларни «Менинг азиз фарзандларим!» дер эдилар.

«Мен ёшларимизга, менинг болаларимга қарата, ўрганишдан ҳеч қачон чарчаманглар, деб айтмоқчиман. Ўрганиш, интилиш ҳеч қачон айб саналмайди. Ниманидир билмасанг, уни ўрганиш зарур.

Авваломбор, энди ҳаётга кириб келаётган ёшларга нима лозим? Ўрганиш, ўрганиш ва яна бир бор ўрганиш керак. Касб ўрганган, илм ўрганган киши, ўзбекона айтганда, ҳеч қачон кам бўлмайди», — дейилади «Она юртимиз бахту иқболи ва буюк келажаги йўлида хизмат қилиш — энг олий саодатдир» китобида.

Шу ўринда, «ўрганиш» сўзига алоҳида эътибор берайлик. Нега айнан ўрганинг дейилмоқда? Чунки фақат билим, ўқишнинг ўзи билан кўп нарсга эришиб бўлмайди. Билимларни қўллаб билиш керак. Ҳаётда бўлаётган воқеа-ҳодисаларнинг маъно-мазмунини ҳам, касб-хунарни ҳам нафақат ўқиб, балки кузатиб, қўлаб кўриб, ўрганилади. Хуллас, «ўрганиб олган» киши биланларини бажариб кўрсата олади.

Хулоса ўрнида Президентимизнинг куйидаги сўзларини келтириб ўтамиз. «Эй болам, сенинг Ватанинг битта — барчамизга азиз, бетакрор мана шу Ўзбекистон. Ота-боболарнинг хоки шу

ерда ётибди. Шу муқаддас замин сени дунёга келтирган, сен уни обод этишинг, ҳимоя қилишинг шарт. Нафақат сенинг ўз ҳаётинг, балки сенга умид кўзини тикиб турган ота-онанг, опа-сингилларинг, ёш гўдаклар, нуроний қарияларимизнинг ҳаёти ҳам ана шу бурчингни нечоғлик адо этишингга боғлиқ».

Президентимиз Ислом Каримов номи Ватанимиз тарихига зарҳал ҳарфлар билан битилади, хотираси халқимиз қалбидан ҳеч қачон ўчмайди.

Бахтиёр САЙФУЛЛАЕВ
Институт ректори

МАНГУ ВА ПОРЛОҚ ХОТИРА

Қани энди, менга дунё минбарида туриб нутқ сўзлаш имконияти берилганида эди, мамлакатимизда ёшларни қўллаб-қувватлаш, ақлан, маънан, жисмонан етук инсон қилиб тарбиялаш, уларнинг таълим-тарбия олишлари учун яратилган шарт-шароитлар ҳақида фахрланганча соатлаб гапирган бўлардим.

Истиқлолимизнинг дастлабки кунларида-ноқ юртимизда ёшлар масаласи ғоят муҳим ва устувор йўналишлардан бири сифатида эътироф этилди ва ўтган йиллар давомида соҳа ривожини йўлида ҳажман катта, сифат жиҳатдан юқори натижаларга эришилди.

Шубҳасиз, буларнинг барчаси Ўзбекистон Республикасининг Биринчи Президенти Ислом Абдуганиевич Каримов номи билан боғлиқдир.

Президентимизнинг хотирасига бағишлаб институтимизнинг ўқув театрида ташкил этилган «Хотира дарси»да ҳам айнан мана шу жиҳатларга алоҳида тўхталиб ўтилди.

Буюк раҳбаримизнинг Ватан равнақи, халқимиз олдидаги буюк хизматларини,

матонати ҳамда жасоратини ёдга олиш мақсадида ташкил этилган мазкур дарсда турли вазирлик ва идоралар, жамоат ташкилотла-




рининг мутасаддилари, профессор-ўқитувчилар, маънавият тарғиботчилари, тарихчи олимлар, сиёсатшунослар, талаба-ёшлар иштирок этди.

Ректоримиз, профессор Бахтиёр Сайфуллаев, Маданият ва спорт ишлари вазири биринчи ўринбосари Фотиҳ Жалолов, Халқ артистлари Муҳаммадали Абдуқундузов, Эркин Комилов, сиёсатшунослик фанлари ном-

зоди Нигора Умаровалар ўз нутқларида юртбошимизнинг улкан яратувчанлик қобилияти, юрт тинчлиги, халқ фаровонлиги, миллатлар осойишталиги, санъат, маданият соҳалари ривожини йўлида амалга оширган ислохотлари, жумладан Ўзбекистон Давлат санъат ва маданият институтининг ташкил топишидаги ҳиссалари ҳақида батафсил тўхталиб ўтди.

Йиғилганлар Президентимизнинг таржимаи ҳоли билан таништирилган, махсус мониторда намоиш этилган фильмда Ислом Каримовнинг Ўзбекистон мустақиллигининг асосчиси, мамлакат мустақил



.....

тараққиёт дастурини ишлаб чиққан ва миллий тараққиёт йўлини белгилаб берган атоқли давлат арбоби, юртимизда амалга оширилган улкан ислохотлар, тарихий ўзгаришларнинг ташаббускори ва раҳнамоси сифатидаги хизматлари ҳақида фикр юритилди.

Бобур ҳазратлари инсоннинг умри тўрт жиҳат билан абадий эканлигини ёзади: яратган иморатлари, барпо этган боғлари, ёзган китоблари ва тарбиялаган комил фарзандлари билан.

Ислом Каримов даврида ҳашаматли бинолар қад ростлади, кўркам боғ-роғлар барпо этилди, минглаб асарлар яратилди, ҳеч кимдан кам бўлмаган баркамол ва бахти бутун йигит-қизлар камол топди. Буларнинг барчаси у инсоннинг қалбимизда мангу эканлигидан далолат.

Йиғилган ёшларнинг юракларида бир сас янграётган эди гўё: «Мен у инсонга бўлган эъзоз, ҳурмат ва садоқатимни изланиш ва интилишим, юксак марраларни забт этишим, юрт равнақида ҳисса қўишим, ўзимнинг моҳир ижроларим, баркамол асарларим орқали дунё ҳамжамиятини лол қолдиришим билан исбот этаман».

Институтимизнинг барча таълим йўналишлари бўйича ўтказилган «Хотира дарслари»да Президентимизнинг хотираси барча ўғил-қизларнинг ёдида мангу сақланиб қолиши, улар Ватанимизни, мустақиллигимизни кўз қорачигидек асраб-авайлаши, тинч ва осойишта кунларнинг қадрига етиши, юртимиздаги ҳамжиҳатлик муҳитини мустаҳкамлаш — бу барча юртдошларимиз каби ёшларнинг ҳам бурчи экани таъкидланди.

Соҳибжон ҲОТАМОВ
Саҳна ва экран санъати драматургияси таълим йўналиши 2-курс талабаси

БУЮК КЕЛАЖАК МАСЪУЛИЯТИ

Хурматли профессор-ўқитувчилар, талабалар, институтимиз ходимлари!



Ўзбекистон Республикаси Давлат мустақиллигининг йигирма беш йиллигини муносиб кутиб олганимизга ҳамда янги 2016–2017 ўқув йилининг бошланганига кўп бўлгани йўқ. Чорак аср давомида мамлакатимизда, шунингдек, биз учун азиз ва қадрдон институтимизда қўлга киритилган ютуқларни сарҳисоб қилиш, мавжуд муаммоларни ҳал этишнинг аниқ илмий йўналтирилган режаларни ишлаб чиқариш барчамиздан улкан масъулиятни талаб этади. Президентимиз Ислам Каримовнинг 2015 йилда нашр этилган «Она юртимиз бахту иқболи ва буюк келажаги йўлида хизмат қилиш — энг олий саодатдир» деб номланган китоби, юртбошимизнинг 2016 йил 2 июндаги «Ўзбекистон Республикаси давлат мустақиллигининг йигирма беш йиллик байрамига тайёргарлик кўриш ва уни ўтказиш тўғрисида»ги қарорида алоҳида қайд этилган. Бу йилги мустақиллик байрамини «Гўзал ва бетакроримсан, муқаддас Ватаним, жоним сенга фидо, Ўзбекистоним!» деган эзгу номни ўзида мужассам этган ташкилий-

амалий, маданий-маънавий ҳамда тарғибот-ташвиқот ишлари дастури асосида ўтказилиши барчамизда кеча ким эдигу бугун ким бўлганимизни англашга, бизни янги марралар сари руҳлантиришга маънавий туртки бўлди.

Дарҳақиқат, 2015–2016 ўқув йили институтимиз жамоаси учун улкан зафарлар йили бўлди. Ўқув-тарбия соҳасида, илмий-тадқиқот, ижодий ишлар борасида муайян ютуқларга эришдик. Хусусан, Талабалар Республика фан олимпиадасида «Тасвирий ва амалий санъат тарихи» фанидан талабамиз Робия Исмагуллаева 3-ўринни эгаллади. Асосий эътиборни таълим-тарбия сифатини оширишдаги бўлажак мутахассисларни янги педагогик, ахборот технологиялари асосида ўқитишга қаратганимиз тўғрисида битирувчи талабаларимизга бўлган эҳтиёж кучайди.

Ўзбекистон Республикаси Вазирлар Маҳкамаси қарори билан тасдиқланган «Олий таълим муассасасининг энг яхши педагоги» Республика танловининг институт босқичида маданият ва санъат муассасаларини ташкил этиш ва бошқариш кафедраси катта ўқитувчиси Ваҳобжон Рустамов «Мутахассислиги бўйича энг яхши педагог» номинациясида, кинотелеоператорлик ва овоз режиссёрлиги маҳорати кафедраси ўқитувчиси Элдор Юлдашев «Энг яхши педагог-тадқиқотчи» номинациясида ҳамда педагогика ва психология кафедраси доценти Шохиста Самарова «Инновация ва ахборот технологияларини қўллайдиган энг яхши педагог» номинацияси бўйича ғолиб деб топилди ва танловнинг республика босқичида иштирок этиш учун тавсия этилди. Республика миқёсида олиб борган алоҳида хизматлари

МУСТАҚИЛЛИК МЕЪМОРИ, ХАЛҚИМИЗ ИФТИХОРИ

Миллатни, халқларни эзгу мақсад сари бирлаштири олиш, уларга тинчлик деб аталмиш буюк неъматни туҳфа этиш ва бундан баҳраманд бўлиш ҳар қандай кишига ҳам насиб этавермайди. Ватан тақдири, юрт шаъни йўлида қилинган ҳар қандай эзгу амалда ҳам қаҳрамонликни, наинки қаҳрамонлик, балки юксак жасоратни топиш мушкул. Аммо биргина оддий ҳақиқат борки, буни халқимиз ҳеч қачон унутмайди. Бизга мустақиллик ўз-ўзидан келиб қолгани йўқ. Биз ҳозиргидек тўқис ҳаётга бирланига эришганимиз йўқ, албатта. Буларнинг асл негизиди қатъий ирода, юксак матонат, доно раҳбарнинг одилона сиёсати турибди. Айни мустақиллик ҳақида гап кетганда, юртдошларимиз бу ноёб неъматни, жамики эришаётган оламшумул ютуқлар ва натижаларимизни буюк давлат арбоби, халқларвар инсон, миллат фахри, бунёдкорлик меъмори, мамлакатимизнинг биринчи Президенти номи ва фаолияти билан узвий боғлиқ деб билади.

1991 йил 31 август. Бу сана Ўзбекистон тарихида, ўзбек халқи хотирасида, тарих зарваракларида абадул-абад муҳрланиб қоладиган унутилмас кундир. Ҳа, бу кун ҳурматли юртбошимиз Ислам Каримовнинг чин маънодаги жасорати, ҳақиқий қаҳрамонлигининг ёрқин ифодасидир.

Юртбошимиз бошлаб берган тараққиёт йўли мана 25 йилдирки, дунё эътирофида, оғир ва қийин вазиятларда, халқаро даражадаги иқтисодий инқирозларга қарамай юртимиз иқтисодиёти барқарор суръатларда ўсаётганлигини кўрсатмоқда. Давлатимиз раҳбари томонидан беш тамойил асосида бутун дунёда тараққиётнинг «Ўзбек модели» деб эътироф этилган Ўзбекистон иқтисодиётини тубдан ислоҳ этиш ва таркибий ўзгаришларни амалга ошириш тўғрисида кенг қўламли ислохотларга эришдик. Айниқса, биз ёшларни таълим олишимиз ва ўсиб-улғайишимиз йўлида амалга оширилган ишларни бир сўз билан ифодалаб бўлмайди. Эскича қолип ва

мезонлардан бутунлай воз кечилган ҳолда Кадрлар тайёрлаш миллий дастури, таълим-тарбия тизими замонавий халқаро стандартларга жавоб берадиган туб ўзгаришларга йўналтирилди. Биз ёшлар меҳрибон, болажон Юртбошимизнинг доимий кўмаги ва ғамхўрлиги остида ана шундай натижаларга эришиб келмоқдамиз. Ҳар доим шу ҳақда гап кетганда, Юртбошимизнинг ҳар бир чиқишларида биз ёшларга қарата айтган «Маррани баланд олинг, болаларим»,

деган эзгу пурмаъно сўзлари ҳамон қўлоғимиз остида жарағлайди. Аммо бешафқат ўлим муҳтарам Юртбошимизни орамиздан олиб кетди. Бироқ у кишининг мустақиллик, юрт тинчлиги ва келгуси ҳаёт учун яратиб берган бунёдкорлик ишлари асрларга татигуликдир. Халқимиз қисқа вақт ичида Юртбошимиз билан оламшумул ютуқларни гувоҳи бўлди. Аммо жасорат ва матонат билан одамларимиз қалбидан муносиб ўрин олган Президентимиз Ислам Каримовнинг ёрқин хотираси ҳамisha биз билан бирга эканлигини ҳис этиб турамыз.

Юртбошимиз ҳар йили мустақиллик арафасида билдирган табриклариди ҳам доим ёшларни бағирларига босиб, уларга қаттиқ ишонишларини, қачонлардир улар келажаги буюк давлатнинг давомчилари бўлишига ишонч билдирар эдилар. Ва бунга жавобан халқимиз, хусусан ёшларимиз Президентимиз ишончини оқлашга, у киши орзу қилган инсонлар бўлишга, мустақилликни кўз қорачигидек асраб-авайлашга албатта сўз беришади.

Мустақиллик бизга бахт келтирди, дунёга танитди ва халқимизни эзгу мақсад сари бирлаштирди. Шундай экан, бу йўлда бир-биримизга камарбаста бўлиб, бу бебаҳо неъматни қадрлаймиз. Юртимиз шаънини юксакларга кўтарамиз.

Мухаррам БОЗОРОВА

Саҳна ва экран санъати драматургияси таълим йўналиши 2-курс талабаси, матбуот бўлими аъзоси

Юксак мукофотлар мубоараси!

Юртимиз мустақиллигининг йигирма беш йиллиги муносабати билан Ўзбекистон Республикаси Президентининг фан, таълим, соғлиқни сақлаш, адабиёт, маданият, санъат, маънавият ва маърифат, оммавий ахборот воситалари ҳамда ижтимоий соҳалар ходимларидан бир гуруҳини мукофотлаш тўғрисидаги Фармони эълон қилинди. Ушбу Фармонда институтимизнинг қуйидаги профессор-ўқитувчилари ҳам юксак унвон билан тақдирландилар.

«Ўзбекистон Республикасида хизмат кўрсатган ёшлар мураббийи»
Жуманов Исоқтой — Ўзбекистон Давлат санъат ва маданият институти саҳна нутқи кафедраси доценти



«Дўстлик» ордени билан
Ёрбеков Эрназар Холмирзаевич — Ўзбекистон Давлат санъат ва маданият институти мусиқали, драматик театр ва кино санъати кафедраси катта ўқитувчиси



учун институт профессор-ўқитувчиларидан саҳна нутқи кафедраси доценти Исоқтой Жуманов «Ўзбекистон Республикасида хизмат кўрсатган ёшлар мураббийи» унвони, мусиқали, драматик театр ва кино санъати кафедраси катта ўқитувчиси Ёрбеков Эрназар Холмирзаевич «Дўстлик» ордени билан мукофотландилар.

Ютуқларга, муваффақиятларга эришиш мумкин, аммо уни ушлаб қолиш, янада ривожлантириш, мустақамлаш ўта қийин жараён. Биз барчамиз 2016–2017 ўқув йилида ана шу ҳақиқатни ёддан чиқармаган ҳолда меҳнат қилишимиз лозим.

Бу ўқув йилида институтимизга юртимизнинг энг иқтидорли, қобилиятли ўғил-қизларимиздан 282 нафар бакалавр ва 29 нафар магистр талаба сифатида қабул қилинди. Уларга юксак талаблар асосида таълим, тарбия бериш, иқтидорини очиш, қалбларига эзгулик уруғларини экиш, биз, профессор-ўқитувчиларнинг олдидаги энг катта, масъулиятли вазифа ҳисобланади.

Ана шу мураккаб, айни пайтда шарафли ишда барча профессор-ўқитувчилар, ходим-хизматчилар, талабаларга мустақам соғлиқ, ижодий ютуқлар ёр бўлишини тилайман.

Бахтиёр САЙФУЛЛАЕВ
Институт ректори

«ОЛИЙ ТАЪЛИМ МУАССАСАСИНИНГ ЭНГ ЯХШИ ПЕДАГОГИ» ТАНЛОВИНИНГ ИНСТИТУТ БОСҚИЧИ НАТИЖАЛАРИ

Ўзбекистон Республикаси Вазирлар Маҳкамасининг 2015 йил 24 февралдаги 32-сонли қарори ҳамда Ўзбекистон Республикаси Олий ва ўрта махсус таълим вазирлигининг 2016 йил 30 мартдаги «Олий таълим муассасасининг энг яхши педагоги» умумреспублика танловини ўтказиш тўғрисидаги 131-сонли буйруғи ижросини таъминлаш мақсадида институти-мизнинг 2016 йил 18 январдаги 18-У-сонли буйруғи қабул қилинди. Ушбу буйруқ асосида



«Олий таълим муассасасининг энг яхши педагоги» танлови тўғрисидаги Низомига мувофиқ, институтда 2016 йилнинг 1 апрелидан 30 майга қадар тегишли таълим соҳалари бўйича

бўйича энг яхши педагог», «Энг яхши педагог-тадқиқотчи», «Инновация ва ахборот технологияларини қўллайдиган энг яхши педагог» номинациялари бўйича танловнинг институт босқичини ўтказиш юзасидан чоратадбирлар режаси ишлаб чиқилди ва масъуллар белгиланди.

2016 йил 1 апрелидан 5 апрелигача танловнинг институт босқичини ўтказиш бўйича мутахассислардан иборат танлов комиссияси таркиби шакллантирилди ва тасдиқланди. 5 апрелдан 15 апрелгача институтда мавжуд тегишли таълим соҳалари ва номинациялар бўйича иштирокчилардан ариза ва ҳужжатлар қабул қилинди. 15 апрелдан 20 апрелгача танлов комиссияси томонидан иштирокчилар тақдим этган ҳужжатлар таҳлил қилинди. 25 апрелдан 15 майгача танлов иштирокчиларининг очиқ машғулотлари ташкил этилди ва баҳоланди. Танлов иштирокчиси томонидан академик гуруҳда Танлов комиссияси вакили иштирокида очиқ дарс ўтказилди ва унинг якуни бўйича ўтказилган очиқ дарс сифатига мазкур Низомнинг 3-иловасидаги мезонлар 23–24 бандларида белгиланган талаблар асосида тегишли баҳо қўйилди. Иштирокчилар илмий-услубий, маънавий-маърифий, илмий тадқиқот ишларининг тақдимотини ўтказишди.

Танлов натижаларига кўра «Мутахассислиги бўйича энг яхши педагог» номинацияси бўйича маданият ва санъат муассасаларини ташкил этиш ва бошқариш кафедраси катта ўқитувчиси Ваҳобжон Рустамов, «Энг яхши педагог-тадқиқотчи» номинацияси бўйича кинотелеоператорлик ва овоз режиссёрлиги маҳорати кафедраси ўқитувчиси Элдор Юлдашев ҳамда «Инновация ва ахборот технологияларини қўллайдиган энг яхши педагог» номинацияси бўйича педагогика ва психология кафедраси доценти Шохиста Самаровалар ғолиб деб топилди ва танловнинг кейинги республика босқичига тавсия қилинди. Ғолиблар Низомда белгиланган миқдорда бир марталик моддий рағбатлантиришга тавсия этилди ва махсус сертификат билан тақдирланди.

Умида ҲАСАНОВА
Тахририят ва нашриёт бўлими муҳаррири

2015-2016 ЎҚУВ ЙИЛИ ЯКУНЛАРИ ВА 2016-2017 ЎҚУВ ЙИЛИГА ТАЙЁРГАРЛИК



2015-2016 ўқув йили давомида институтда ўқув ишлари Олий таълим тизимига қўйилган талаблар асосида олиб борилди. Якунланаётган ўқув йилида 29 та бакалаврият таълим йўналишлари ва 14 та магистратура мутахассисликларида дарс жараёни 2012-2016 йилларда Ўзбекистон Республикаси Олий ва ўрта махсус таълим вазирлиги томонидан тасдиқланган 32-36 соатлик ўқув режалари асосида ташкил этилди.

2015-2016 ўқув йилида ўқув жараёни Ўзбекистон Республикасининг «Таълим тўғрисида»ги Қонуни ва «Кадрлар тайёрлаш миллий дастури»да белгиланган вазифалар, Олий ва ўрта махсус таълим, Маданият ва спорт ишлари Вазирликларининг ўқув жараёнига оид метёрий ҳужжатларига ва институт ректорининг буйруқ ва кўрсатмаларига амал қилган ҳолда ташкил қилинди.

2015-2016 ўқув йилида барча таълим йўналишлари ва магистратура мутахассисликларида жами 1304 нафар, шундан 29 та бакалаврият таълим йўналишларида 1218 нафар талаба ва 14 та магистратура мутахассисликларида 86 нафар талабалар тахсил олди.

2015-2016 ўқув йилининг иккинчи ярим йиллик якунларига кўра факультетларда фанлардан талабаларнинг ўзлаштириш кўрсаткичлари институт бўйича 98%ни ташкил этди.

Барча таълим йўналишлари ва мутахассисликларида талабаларнинг билимини назорат қилиш ва баҳолашнинг рейтинг тизими тўғрисидаги (ОЎМТВнинг 2010 йил 25 августдаги № 333-сонли буйруғи билан тасдиқланган) Низомга мувофиқ баҳолаш турлари бўйича фанлар кесимида назорат саволлари ва тестларнинг электрон базаси шакллантирилиб ўқув жараёнига жорий этилди. 2016-2017

ўқув йили олдида институт таълим йўналишлари ва мутахассисликлари аттестация ва акредитациядан ўтди.

2016-2017 ўқув йилига тайёргарлик ишлари ўтган ўқув йилининг якунидан бошлаб юборилган бўлиб, ўтган давр мобайнида институтнинг мавжуд 26 та бакалаврият таълим



йўналишлари ва 16 та магистратура мутахассисликларининг ишчи ўқув режалари қайта кўриб чиқилиб, 2016 йилнинг 29 июнь куни институтнинг Илмий Кенгашида тасдиқланди. Бошланаётган ўқув йилида 19 та бакалаврият таълим йўналишлари ва 14 та магистратура мутахассисликларининг Малакавий талабалари ва намунавий ўқув режалари ишлаб чиқилиб, Ўзбекистон Республикаси Олий ва ўрта махсус таълим вазирлиги қошидаги Олий ва ўрта махсус, касб-хунар

таълимини ривожлантириш марказига тасдиққа тасвир этиш масаласи кўрилмақда. Тасдиқланган ишчи ўқув режалар асосида 2016-2017 ўқув йили учун дарс жадвали шакллантирилиб, якунига етказилди. Институтдаги машғулотларни олиб бориш учун ажратилган 93 та аудиториялар фанларнинг хусусиятидан келиб чиқиб дарс жадвалида тақсимланди. 2016-2017 ўқув йили учун кафедралар кесимида ўқув соатлари ҳисоб-китоб қилинганда 189293 соатни ташкил этмоқда.

Ўзбекистон Республикаси Олий ва ўрта махсус таълим вазирлигининг 2014 йил 10 майдаги Ҳайъат қарори (3/1-сонли) ижросини таъминлаш мақсадида фанларни модул асосида ўқитишни ташкиллаштириш, кейс-стади асосида ўқув машғулотларини такомиллаштирилган усулларда ташкил этиш, фанлар бўйича модулларнинг таркибий қисми сифатида силлабуслар ишлаб чиқиш ва маълумотларни ички (Интернет) платформаларини ташкил этиш ишларини барча кафедраларда жорий йилнинг август-сентябрь ойининг охирига қадар ҳар бир кафедрала ўқитиладиган фанларни модул тизимига киритиш муҳим масала сифатида қаралмоқда.

Янги ўқув йилида талабалар учун тест саволлари, мустақил ишлар, курс ишлари вариантлари ва уларни баҳолаш мезонлари ҳамда услубий кўрсатмаларни тайёрлаш, ҳар бир кафедрала ўқитиладиган барча фанлар бўйича ишлаб чиқилган ўқув-услубий материаллари тақдимотини ўтказиш масаласи кўрилмақда. Юқорида қайд этилган вазифаларни бажаришда институтимиз профессор-ўқитувчиларига куч-қувват тилаб қоламиз.

Абдурашул ҲОЗОВ
Ўқув бўлими бошлиғи

ТАЛАБАЛИК — ОЛТИН ДАВРИМ!



Муносиб фарзанд бўлайлик!



Бир неча йиллик тайёргарликдан сўнг, шу йил мен Ўзбекистон Давлат санъат ва маданият институтининг ижтимоий-маданий фаолият бўлимига давлат гранти асосида ўқишга қабул қилиндим. «Яхши ният — ярим давлат» деганларидек, ниятни ҳолис қилиб, эндики кучни ўқишга, пухта билим олишга қаратишни жоиз деб биламан. Устозлардан олган билим ва тарбия келажакда ўз натижасини беради. Демокриманки, биз ёшларга Президентимиз томонидан белгилаб берилган гамхўрлик ва яратилган барча шарт-шароитлардан фойдаланиб, катта-катта режа ва лойиҳаларни ўз олдимизга мақсад қилиб қўйган ҳолда ишлашимиз, юртимизнинг эртаси учун янада фаолроқ бўлишимиз, халқимизга, ота-онамизга муносиб фарзанд бўлиш йўлида интилоғимиз даркор.

Ситора ТОШПҲЛАТОВА
Ижтимоий-маданий фаолият таълим йўналиши 1-курс талабаси

Ниятига етдим



Орзу, умид, ният, армон. Ҳа, мен бугун орзу қилган, умид қилган ниятимга етдим, армонларим ушалди. Яъники, мен ёшлигимдан ҳавас қилган санъат институтига шу йил ўқишга кирдим, талаба бўлдим. Касблар кўп, аммо инсон ўзи орзу қилган касбига эришишини энг олий бахт деб ҳисоблайди. Онамнинг айтишларига қараганда, бешикда ёганимда ҳам куй ва кўшиқлар сеҳрига қулоқ тутиб ухлар эканман. Келажакда ашула ва рақс гуруҳлари очиб, санъатимизнинг янада гуллаб-яшнаши учун устозларим ўғитига қулоқ тутиб, тинмай изланаман ва ўз касбининг моҳир устаси бўлиб етишишга ҳаракат қиламан.

Ўлмас АЗИМОВ
Халқ ижодиёти. Ашула ва рақс таълим йўналиши 1-курс талабаси

Умидларим чексиз



Мен Ўзбекистон Давлат санъат ва маданият институтининг «Очиқ эшиклар куни» муносабати билан ўтказилган тадбирдан руҳланиб, «Шу даргоҳга кириб ўқийман» — деган ўй билан институтнинг вокал бўлимига ҳужжат топширган эдим. Имтиҳонлардан муваффақиятли ўтиб талаба бўлдим. Ота-онамнинг, айниқса, ўзимнинг хурсандчилигим бекиёс. Юртимизда ёшлар учун яратилган кўпгина шарт-шароитлар инсонни янада кўпроқ ўқишга, яхши ишлашга ундайди. Келажакда етук мутахассис бўлиш учун устозларимдан илм сирларини пухта ўрганиб, албатта юртимиз санъатини баланд чўққилар сари олиб чиқишга ўз ҳиссамни қўшаман, деб умид қиламан.

Рушана ШОКАРИМОВА
Касбий таълим: вокал таълим йўналиши 1-курс талабаси

Талаба бўлдим



Талабалик — олий бахт. Ушбу тушунча ҳар бир қалб эгасини тўлқинлантиради, қувонтиради, олий мақсад сари илм чўққиларини эгаллашга ундайди. Ҳа, мен ҳам шу йил талаба бўлиш шарафига муяссар бўлдим. Қувончу шодлиқларим бир дунё. Келажакда устоз-мураббийларимиздан илм сирларини пухта ўрганиб, Ватанимизнинг равнақи йўлида хизмат қилиб, маданият ва санъат муассасаларини ташкил этиш ва бошқариш йўлида тинмай изланаман, ўқийман, ўрганаман ва ўз касбим бўйича юқори натижаларга эришишга ҳаракат қиламан.

Умида УСАНОВА
Маданият ва санъат муассасаларини ташкил этиш ва бошқариш таълим йўналиши 1-курс талабаси

Шукрона



Юртимиз мустақиллигининг 25 йиллик байрами арафасида талаба бўлишдек олий мақсадимга эришганим мен учун жуда катта муваффақият бўлди. Ўзим орзу қилган Ўзбекистон Давлат санъат ва маданият институтининг кинооператорлик бўлимига ҳужжат топширган кунимдан бошлаб, ўзимни бахтиёр ҳис этиб, яхши ниятлар билан имтиҳонларга қизгин тайёргарлик кўрганам ўз натижасини берди. Келажакда ўз касбимга муносиб мутахассис бўлиб етишишга интиламан.

Давлатбек ҲОЗАЛИЕВ
Кинооператорлик таълим йўналиши 1-курс талабаси

Орзуга айб йўқ



«Орзуга айб йўқ» — дейди доно халқимиз. Ҳақиқатда кимки ёшлигидан ниманики орзу қилган бўлса, шунга интилса, албатта, ўз орзусига эришишига яна бир бор ишонч ҳосил қилдим. Анча йиллардан буён ўзим ҳавас қилган таниқли режиссёр Замира Бегимқуловага ҳурматим жуда баланд эди. Келажакда мен ҳам Замира опадек чироили кино, сериаллар ишлашни ўз олдимга мақсад қилиб қўйганман ва албатта бунга эришаман, деган умиддаман.

Феруза БЕКМУРОДОВА
Кино ва телевидение режиссёрлиги таълим йўналиши 1-курс талабаси

Қўшалок байрам



Жаннатмакон юртимизнинг 25 йиллик Мустақиллиги арафасида менинг талаба бўлишим мен ва ота-онам, яқинларим учун эсда қоларли қўшалок байрам бўлди. Юртимизда барча соҳаларда юксак ўзгаришлар, кўриб кўзингиз қувнайдиган даражадаги ривожланишлар ва айниқса, биз ёшларга барча шарт-шароитларнинг яратилиши дунёдаги энг бахтиёр ёшлар эканлигимиздан далолат беради. Қайси бир соҳага қарамаган, барчасида ўсиш, янгилиниш, ривожланиш. Жумладан, санъат соҳасида ҳам худди шундай. Мен ҳам мазкур институтни тугатиб, келажакда санъат ва маданият соҳасини ривожлантириш, Ватанимиз равнақи йўлида хизмат қилишга бор куч ва билимимни сарфлашга тайёрман.

Достонбек НЕЪМАТОВ
Эстрада ва оммавий томошалар режиссёрлиги таълим йўналиши 1-курс талабаси

Ҳолис ният



Мен Республика рассомчилик коллежини муваффақиятли битириб, ёшлигимдан орзу қилган Ўзбекистон Давлат санъат ва маданият институтига ҳужжатларимни топширдим. Маданий ҳордиқ сифатида ота-онам кичиклик пайтимиздан доимо бизни кўғирчоқ театрига олиб борардилар. Ўша пайтдан театрға, айниқса, актёр-актрисаларнинг ижодларига жудаям қизиқишим ортгани сабабми, албатта мен ҳам кўғирчоқ театри актрисаси бўламан, деб орзу қилардим. Аллоҳга шукр, ниятим ҳолис эканки шу йил ўзим орзу қилган сеvimли масканим санъат ва маданият институтининг кўғирчоқ актёрлиги санъати бўлимига ўқишга кирдим. Мен ва ота-онам бундан бахтиёрмиз. Келажакда албатта, ўз соҳамнинг етук мутахассиси бўлиб, ижодим билан болажонлар меҳрини қозонаман, деган умиддаман.

Муҳлиса АБДУРАЖИМОВА
Кўғирчоқ актёрлиги санъати таълим йўналиши 1-курс талабаси

Ўзбекистон Республикасининг «Таълим тўғрисида»ги қонуни, «Кадрлар тайёрлаш Миллий дастури»нинг 4.5 банди талабаларига мувофиқ институтда тахсил олаётган талабалар орасидан мутахассислик ва умумкасбий фанлар бўйича ўз қобилиятини намоён этиш, ривожлантириш ва қўллаб-қувватлаш ҳамда Олий ва ўрта-махсус таълим вазирлигининг 2016 йил 29 мартдаги «2016 йилда олий таълим муассасалари талабалари Республика фан олимпиадасини ташкил этиш ва ўтказиш тўғрисида»ги 129-сонли буйруғининг ижросини таъминлаш мақсадида институт ректори томонидан 2016 йил 2 апрелда 115-У-сонли ички буйруғи чиқарилди. Ушбу буйруққа асосан 2016 йил апрел ойида институтда талабалар фан олимпиадасининг биринчи босқичи ўтказилди. Биринчи босқич 6 та йўналиш бўйича ташкил қилинди.

Талабалар Республика фан олимпиадаси Низоми, ўтказиш тартиби ва баҳолаш мезони билан таништирилди. Институт бўйича фан олимпиадасининг биринчи босқичида жами 62 нафар талаба иштирок этди. Фан олимпиадасининг биринчи босқичи Республика фан олимпиадаси Низомига асосан 4 тур бўйича ўтказилди.

Ҳар бир фан бўйича ўтказилган олимпиадада малакали профессор-ўқитувчилар ва тажрибали мутахассислардан иборат

II босқичида иштирок этиш учун кино, ТВ ва радио санъати факультети 2-курс талабаси Ёдгоров Шехроз Шайдуллоевич (илмий раҳбари — катта ўқитувчи Содиқова Муқаллам Исмоловна) лойиқ топилиб, 2016 йил 11-12 май кунлари бўлиб ўтган олимпиадада муваффақиятли иштирок этди ва фахрий ёрлик билан тақдирланди.

Рус тили фани бўйича Қўқон давлат педагогика институтида бўлиб ўтган Республика фан олимпиадасининг II босқичида иштирок этиш имкониятини қўлга киритган халқ ижодиёти факультети 1-курс талабаси Абдурахимов Иброҳим Абдунаби ўғли (илмий раҳбари — катта ўқитувчи Абдухаликова Дилфуза Абдумажидовна) 2016 йил 16-17 май кунлари бўлиб ўтган олимпиадада муваффақиятли иштирок этиб, фахрий ёрлик билан тақдирланди.

Институт саралаш босқичи ғолиби кино, телевидение ва



Талабалар Республика фан олимпиадаси ғолиби — Исмагуллова Робия Абдулла қизи

Ўзбекистон давлат санъат ва маданият институтида ўтказилган

4-5 кишилиқ ҳакамлар ҳайъати тузилиб, тегишли кафедралар томонидан олимпиада таркибига киритилган фанлар бўйича ёзма иш ва тест синовларини фан дастурига асосланган ҳолда ишлаб чиқилди. Фан йўналишлари бўйича юқори кўрсаткичга эга бўлган талабаларга 1-2-3-ўринлар берилди. Ҳар бир йўналиш бўйича 1-ўринни эгаллаган талабалар Республика фан олимпиадасининг иккинчи босқичига тавсия қилинди.

Инглиз тили фани бўйича Самарқанд давлат чет тиллар институтида бўлиб ўтадиган Республика фан олимпиадасининг

радио санъати факультети, театр-шунослик бўлими 4-курс талабаси (ҳозирда санъат назарияси ва тарихи мутахассислиги 1-курс магистранти) Исмагуллова Робия Абдулла қизи Камолиддин Бехзод номидagi Миллий рассомчилик ва дизайн институтида ўтказилган «Тасвирий ва амалий санъат тарихи» фани бўйича 3-ўринни қўлга киритди. У 3-даражали диплом билан тақдирланди.

Зулхумор НОРҚЎЗИЕВА
Маънавият ва маърифат бўлими бошлиғи

Туни билан ёққан қорға тонг саҳардан бошлаган аччиқ совуқ «газак» бўлди. Ҳавонинг кайфияти таъбимни бузди-ю, аммо ишга бормасам бўлмади. Иссиқ кийимларимни кийиб, йўлга отландим. Кўча кутганимдан анчайин совуқ. Уйимдан бекатга етиб келгунча, портфел кўтарган қўлим совуқдан увушиб, қони қочди. Йўлда одам кам, борлари ҳам биров у ёққа, биров бу ёққа, хуллас, ҳамма ҳар томонга шошган. Гўзал бир манзара: дарахтлар, симёғочда осигилиқ турган светофор... Аммо табиатдан олаётган завқимни қандайдир бир ғалати овоз келаётган томонга ўғирилдим. Бу овоз юнглирининг бир қисми тўкилиб, гўшти қўринган, нимжон танаси совуқдан дағ-дағ титраган бир ит боласи келаётган эди. У шунчалар заиф ва ачинарли эдики, кўзи тушган инсоннинг хотирасида муҳрланмай қолмасди. Фингшиб, чийиллаб ўриндиққа музлаб ёпишган нон парчасига талпинарди. Аввал икки оёқда туриб чўзилди, сўнг думини ликиллаб сакради. Лекин бари бефойда, етолмади. Муаммо камлик

қилгандек, нон бўлаги устига келиб кўнган қушча унинг ғашини келтирди. Ўткир тиши, кескир тирноқлари бўла-



Ҳикоя

туриб насибасига бир қадам етмаган ит боласига, очиги, ачиндим. Аммо кўкларни забт этган, абжирликда рақибдан ўзган, ҳатто егулигини оёқлари остида босиб туриб, келгандан буён тумшугини тикиллаб музлаган нонга ураётган қушчанинг ҳам аҳволига ҳавас қилиб бўлмайди. Буларга ёрдам бергим

келди-ю, лекин бироз аввал чўнтагимга солган қўлларимни иссиқдан чиқаргим келмади. Йўлда одам кам, борлари ҳам биров у ёққа, биров бу ёққа, хуллас, ҳамма ҳар томонга шошган. Мен ҳам бошқа инсонлар сингари автобустга миниб йўлимга равона бўлдим. Куннинг ўрталарига бориб ҳаво бироз илди. Лекин бу узоққа чўзилмади. Ишдан қайтар маҳалим жўрттага қилгандек аёз бошланди. Яна ўша автобус, ўша бекат, ўша ўриндиқ, унинг остида очликдан тиришиб қотган ит боласи, ёнбошида эса бир бўлак музга айланган қушча ётарди. Улар ҳаракатсиз, улар мурда, лекин кўзлари нон бўлагига. Ўриндиқ устида эса нон бўлагини чўқилаётган қушлар галаси. Йўлда одам кам, борлари ҳам ҳамма ҳар томонга шошган.

Обиджон РЎЗИБОЕВ
Саҳна ва экран санъати драматургияси таълим йўналиши 3-курс талабаси

Кунимиз аксарият ҳолларда ўқиш, иш, уй юмушлари-ю, ҳаёт ташвишлари билан ўтади. Ана шу бир кун ойларга, ойлар эса йилларга ўз ўрнини бўшатиб беради. Ўтиб бораётган умримиз давомида шундай вазиятлар бўладики, ёлғиз қолишни истайсиз. Ана шундай онда сизга фақатгина кўнғил соҳилигина таскин бера олади. Зеро, ўзингиздаги муаммоларни фақатгина кўнғилгизгина сеза олади ва тўғри қарор қабул қилишингизда ёрдам беради. Кўнғил соҳили нима экан деб ўйларсиз. Мен ҳам бунни олдинлари билмагандим. Илк бор талаба бўла олмай университет остонасидан қайтган он ўзимни миллионлаб одамлар орасида кўринмай кетаётган инсондай ҳис қилган куним бехос кўнғил соҳилимга бориб қолганман. Гўёки ҳаётда ҳеч кимга ёрдамим тега олмайдиган кераксиз инсондай туюлганда кўзларимдан томган кўз ёшлар ила яралган денгиз мавжлари хаёлимни олганди. Биргина шу мавжлар ҳар бир қабул қилаётган қарорларимни ўйлашга ундаганди. Ҳаётда тўғри қарор қабул қилишга ўргатганди. Кўнғилимнинг синиқ бўлақларидан яралган қоятошларга урилаётган тўлқинлар қатъиятлилиги эса мени ўзимга бўлган ишонччи янада мустаҳкамлади. Ўзимга бўлган ишонччи хис қилиш эса мени келажакда катта ютуқларга эриша олиш қўлимдан келишига умид берди. Шу бўйи анча вақт кўнғил соҳилимда қўлиб кетгандим. Кўнғил соҳили ҳамма одамларда мавжуд. Фақатгина кимдир унга эртароқ, кимдир эса кеч йўл топади. Ҳар сафар ўзимга бўлган кучли ишонччи туйган

кезларим яна ва яна соҳил томон боравераман. Чунки соҳилни мен қандай хоҳласам шундай кўринишда, яъни гоҳ қумли, гоҳ тошли. Денгиз эса гоҳ яшил, гоҳ менинг сеvimли рангим бўлган мовий рангда.

Соҳилга йўл...

Қоятошлар эса доим оқ рангдаги турли шаклларда намоён бўлади. Энг асосийси, мен қандай ўйласам соҳил худди шундай гавдаланади кўз олдимда. Яқиндан эса денгизда босиб ўтган ҳаёт зарварақлари акс этган кемалар пайдо бўлди. Уларнинг сони 19 та. Улар доим соҳилга борганимда ўтган умрим давомидаги бахтли ва ташвишли онлар хотираларини жонлантиради. Шу сабаб кемаларга қараб, топган инсонларимни эслаб қувонсам, йўқотган ва кўра олиш имконим бўлмаган инсонларимни эслаб йилгайман. Хуллас, ҳар гал кўнғил соҳилимга бормоқчи бўлсам кўзларимни юмиб ўша ерда танҳо пайдо бўламан. Сўнг эса яна шовқинли одамлар олдида ўзимда кучли ишонч ва лабда кулги билан қайтаман. Истайманки, ҳамманинг кўнғил соҳили обод ва озод бўлсин! Мовий осмонида оқ орзу каби оқ кабутарлар парвоз этаверсин!!!

Хулқар ЎРАЛОВА
Ижтимоий-маданий фаолият таълим йўналиши 2-курс талабаси



Ёруғ тонглар сирға таққан наҳорларда, Сахий қуёш нур улашган саҳарларда, Бу диёрнинг муқаддас, пок бўйлари бор, Момоларим таққан асл туморларда. Дунёга зеб берган садарайхон ўзинг, Ўзбекистон ўзинг, Ўзбекистон ўзинг. Не баётдир жонбахш кўшиқ, аллаларинг, Ёстигинга қуёш қўнган паллаларинг. Қўзмунчоқдир жанный тўрт фаслинг аро, Кўзларига ҳайрат тўлган болаларинг. Ҳар кимга ҳам насиб этмас бўстон ўзинг, Ўзбекистон ўзинг, Ўзбекистон ўзинг. Ҳаётимиз тангри берган неъмат бўлур, Савоб қилсак умримизга неъмат бўлур. Эл юкини елкаласак оғринмайин, Дуога қўл очсанг қанча қувват бўлур, Етмиш икки томирдаги дармон ўзинг, Ўзбекистон ўзинг, Ўзбекистон ўзинг. Синовдир бу кимлар келиб, ким кетмаган Ҳавас қилиб кимлар етиб, ким етмаган, Бешигида авлиёлар ўсган элнинг — Дуо истаб қўлларидан ким тутмаган. Етмиш икки томирдаги дармон ўзинг, Ўзбекистон ўзинг, Ўзбекистон ўзинг. Аслим билинг — битта яхлит юракмиз биз, Пахтадай оқ, сувдай тиниқ тилакмиз биз. Икки дунё тақдиримиз шу заминда — Фақатгина шу Ватанга керакмиз биз. Замон ўзинг, макон ўзинг, жаҳон ўзинг — Ўзбекистон ўзинг, Ўзбекистон ўзинг.

Сайёра ТҶҲИЕВА
Маданият ва санъат муассасаларини ташкил этиш ва бошқариш кафедраси профессори

СОҒЛОМ БОЛА ДУНЁГА КЕЛСА

Соғлом бола дунёга келса, Нурга тўлиб ёришар олам. Хонадонни фойзга тўлдириб, Унга меҳрин беради одам.

Соғлом бола дунёга келса, Кулгусидан куртаклар дарахт. Фаришталар сочларин силаб, Тортиқ этар унга олий бахт.

Соғлом бола дунёга келса, Дуога қўл очиб кексалар — Яратганга истиффор айтар, Халққа шундай фарзанд берсалар.

Соғлом бола дунёга келса, Яшнаб кетар она табиат. Чўққиларга қўлини чўзиб, Юксалади яна жамият.

Соғлом бола дунёга келса, Юртада ҳар кун тўйу томоша. Иқболидан ибрат олар эл, Йиллар оша, асрлар оша!!!

Бобур УБАЙДУЛЛАЕВ
Маданият ва санъат муассасаларини ташкил этиш ва бошқариш таълим йўналиши 2-курс талабаси

Кўнғил

Мен дунёга керакман, Омад мени кутмоқда.

Таскин топган юракман, Кўнғил умид ютмоқда.

Бахт келади қачондир, Қалб эшигим вобаста.

Севиш асли имондир, Ишққа кўнғил пайваста.

Ёмонини яширдим, Гўзал қилдим ҳулқимни.

Оллоҳимга топширдим — «Кўнғил» деган мулкимни!

Достонбек РАҲМАТУЛЛАЕВ
Саҳна ва экран санъати драматургияси таълим йўналиши 4-курс талабаси

Муассис

Ўзбекистон Давлат санъат ва маданият институти

Бош муҳаррир
Эркин ХУДОЙБЕРДИЕВ

Таҳрир хайъати:
Гўзал ХОЛИҚУЛОВА
Ҳамдам ИСМОИЛОВ
Зулхумор НОРҚЎЗИЕВА
Умида ҲАСАНОВА
Шоҳруҳ АБДУРАСУЛОВ
Рашид УСНАТОВ
Муҳаррам БОЗОРОВА

Саҳифаловчи-дизайнер:
Умида ҲАСАНОВА

Таҳририят манзили: 100025 Тошкент шаҳри М.Улуғбек тумани, Ялонғоч мавзеси, 127 А уй
Тел.: +99890 349 71 72;
+99871 230 28 13
www.dsml.uz; dsml_info@olam.uz

Газета ҳар ойнинг охириги 1афсасида «NISO POLIGRAF» МЧЖ босмахонасида чоп этилади.
Манзил: Ўрта Чирчиқ тумани, Оқ ота ҚФЙ, Машғал маҳалласи, Марказ — 1.

Газета Тошкент шаҳар Матбуот ва ахборот бошқармасида № 02-00166 рақами билан 2012 йил 19 декабрда рўйхатга олинган.

Газета институтнинг таҳририят ва нашриёт бўлимида тайёрланди. Ўлчами — А3, ҳажми — 2 босма табоқ.
Нусхаси — 1400 дон. Баҳои келишилган нарҳда.
Чоп этишга 09.09.2016 да топширилди.